

Rapòrt d'activitats de l'annada 2018
presentat da Joan-Pèire SPIES, President sortent,
a l'Acampada Generala dau 9 de fevrier dau 2019 en Bergier

Cari amigas, cars amics e sòcis,

Vòli aremerciar de'n premier la comuna d'**EN BERGIER**, lo sieu Cònsol **SÉNHER GERARD LOMBARDO**, aquí present, dau sieu acuelh e dau prèst d'aquesto luec per la tenguda de la nòstra Acampada Generala. Aremercii tanben toi aquelu que si son desplaçats per l'Acampada Generala, qu'es lo moment annadier lo mai fòrt de la vida de la nòstra associacion. Saludi finda aquelu que mi demandèron excusa que non si posquèron desplaçar e que mandèron lo sieu poder.

Saludi **SÉNHER MIQUÈU ARNAUD**, president dau CREO Provence, e **DÒNA JAUMELINA ARNAUD**, que mi demandèron de lu excusar de non poder assistre au nòstre acamp.

Venèm d'emparar que lo nòstre sòci e amic **ANDRIEU SAÏSSI**, magistre dau cors de **LA CÒLA DE LOP**, comedian dins la chorma de teatre e actiu dins l'associacion embé totplen de responsabilitats, es a l'espitau. Pensam en eu e l'asseguram de tota la nòstra amistat.

Maugrat que la data dau nòstre acamp siguèt remandada au mes de fevrier, vos desiri una pròpi bona annada 2019. Que l'an novèu sigue portaire d'avançadas per la lenga d'Òc, lo respèct e la promocion dei lengas, la diversitat culturala dins un esperit de convivença aquí e dapertot.

Que la nòstra associacion recampe de gents plen d'estrambòrd, de vivacitat, per que l'occitan tengue la sieu plaça dins la ciutat, dins la vida de cada jorn, e que sigue sorga de riquesa e de partiment.

Que segon la tradicion, l'annada 2019 sigue ben granada e ben acompanhada, per vautres e li vòstri familhas.

Vequí lo rapòrt d'activitats per l'annada 2018 :

Per la nòstra associacion, lu eveniments d'importança d'aquesta annada dau 2018 siguèron, fòra de toi lu rescòntres regulars dei cors e activitats que reczampen lu sòcis de lònca :

la presentacion de l'**ESPECTACLE LO RIU DE LA VIDA**, da l'**ATALIER COMEDIA** lo 20 de junh,

I'ANNIVERSARI DEI DÈTZ ANS DE LA RUBRICA RIBON-RIBANHA, festejat coma si dèu lo 16 de novembre a **SANT-ANDRIEU-DE-LA-ROCA**,

lo recampament dau **CONGRÈS DAU FORUM D'ÒC** a **NIÇA** lo 17 de novembre, que la comuna de Niça firmèt la sieu adesion,

li **RAPRESENTACIONS TEATRALI** de **L'ISTÒRIA DE JANA, LA PICHONA MESTRESSA DE LAS MARMÒTAS**. Après lo succès remirable de la premiera lo 17 de novembre dau 2017 en **BERGIER**, doi represas que auguèron totplen de succès, lo 10 de junh a **L'ESPACI DAU TIÈLH** de **SANT VALIER DE TIÈLH**, e a **NIÇA**, au **TEATRE DE LA CIUTAT** lo de 18 novembre, davant d'una sala clafida,

la capitada de la **DICTADA OCCITANA** a Niça, que l'IEO-06 li portèt toti li sieu fòrças, (170 personas en lo 2018 e **MAI DE 200 PERSONAS** doi setmanas fa perr l'edicion dau 2019)...

Une annada plena, rica d'eveniments....

Tenèm a reengraciar toti li personas que siguèron a l'òbra, que permetèron la capitada d'aquestu eveniments, dirai lo sieu nom dins lo rapòrt, vi demandi d'aver lo gentum de mi faire assaupre se de còup denembri quauqu'un...

La vida de la seccion

1 administracion

L'associacion recampèt **203 SÒCIS** en lo 2017 (208 en lo 2017, 210 en lo 2013, 167 en lo 2008, 124 en lo 2005).

Cinc associacions siguèron sòcias de l'IEO-06, vòli reengraciar lu sieus responsables :

ALP'HARMONIA,
CANTAR LO PAÍS A L'ESCÒLA ,
PIADA CIE VOCALE,
LA SOCIETAT D'ART E D'ISTÒRIA DAU MENTONASC (SAHM),
SOTA ÒRME, que festejèt aquest'an lo sieu anniversari de detz ans.

Lo C.A. s'es acampat 3 còps en lo 2018 : lo 10 de març, lo 24 de mai, lo 17 de decembre.

Avèm participat tanben :

a l'**ACAMPADA GENERALA DE L'IEO FEDERAL** a **SÈTA** lu 28 e 29 d'abriu. L'IEO-06 siguèt rapresentat per **MAURICI CASCIANI**.

ai **RESCÒNTRES OCCITANS EN PROVENÇA**, au principi d'aost. Siguèron lu animators de l'**ATALIER LENGA JOAN-PÈIRE BAQUIÉ**, de l' **ATALIER BOTÍS REGINA BAQUIÉ**, de l'**ATALIER TEATRE JOAN-PÈIRE SPIES**, de l'**ESCOLETA** dei Rescòntres **VERONICA CHAMPOLLION**. L'i participèron per lo tot 12 sòcis de l'IEO-06,

au Congrès dau Forum d'Òc a Niça lo 17 de novembre (Joan-Pèire Spies e toplen d'autres sòcis...)

Vòli aremerciar aquelu que participèron a toi aquelu acamps que fan viure la nòstra associacion.

Vòli aremerciar finda lo nòstre clavaire, Maurici Casciani, per lo sieu trabalh, que si fa dins l'ombra dau sieu libre comptable, un trabalh que nos es util e indispensable. L'aremercii tanben per lu sieus dorsiers pròche li diversi collectivitats, e **ANNA-MARIA GARCIA-SGARAVIZZI**, clavairitz ajoncha ;

Joan-Pèire Baquié, lo nòstre president onorari, per lo sieu trabalh rapòrt au site e ai pàginas Facbook e **MARC WALTZER** lo nòstre vice-president, rapòrt ai rubricas Ribon-Ribanha e l'Agachaire.

Pura, en causa de totplen d'activitas personali, non capitèri d'establir un ligam de lònca embé la nòstra segretairitz, **PATRICIA FUNGHINI**, e lo bureu non fonccionèt coma si dèu l'an passat. Es un problèma que n'avèm parlat dins la darriera acampada dau CA, troverem lèu de respòstas per melhorar la situacion.

La vida de la seccion

2 Li nòstri relacions emb'ai associacions amigui

Es de primera importança de recampar l'energia dei associacions. Es per aquò que travalham en cooperacion embé li associacion afrairadi, ja citadi.

Metèm en rega, sus la telaranha tot cen que tòca a la vida e activitats dei associacions afrairadi.

D'autri associacions an de ligam pròches embé l'IEO-06, son d'associacions que capisson la necessitat de travalhar ensems a la reconoissença e a l'expansion de la lenga, sus tot l'espaci de la lenga d'òc, e que meton la sieu energia dins una vista larga e duberta da la nòstra cultura.

Pe aure, siam estacats au partenariat, en particular embé li associacions que obrejan embé l'IEO-06 per l'organizacion de la dictada occitana a Niça (per memòri : *l'Association des Professeurs de Langues Régionales (A.P.L.R.)*, *la Ciamada nissarda*, *le collectif des Arts*

traditionnels, la Fédération des Associations du comté de Nice, Nice La Belle, Nissart per tougiou, Parlen ! Oc-bi countea) que son d'associacions que podèm travalham en fidança em'eli.

Au revege, li relacions non si son melhoradi embé una associacion que desira èstre sòci de l'IEO-06, mas

que refuda de participar ai accions de recampaments entrepresi da l'IEO-06, per exemple que non accepta de participar a l'organizacion comuna de la dictada occitana a Niça, qu'organiza una altra manifestacion lo meme jorn, emplegant lu mejans de comunicacions que meteriam en plaça, faguent ensinda de mescladissa pròche dau public e de li institucions en plaça de promòure la cooperacion tra associacions, e jugant ensida còtra de l'IEO-06 ;

que refuda finda la neutralitat politica que desira gardar l'IEO-06, dau fach que sosten de maniera publica e a bei uelhs vesents la «republica de Niça», au travers de la promocion de la moneda locala inventada da aquesta republica fantaumiera, e que la sieu tòca es de crear un estat fòra de França, que nen siam nautres associacion reconoissuda d'utilitat publica per la França.

Per autre lu sieus responsables escrivon de paraulas mensoneguieri rapòrt a l'IEO-06 sus dei rets sociaus.

Lo bureu serà menat a parlar d'aquesta situacion.

La vida de la seccion

3 Li relacions emb'au monde politic e emb'ai institucions

Recevem de subvencions dei comunas de **NIÇA, COARASA, LA CÒLA dDE LOP, GRASSA**, qu'aremerciam. Li comunas de **DRAP, CÒNTES, PELHON, PELHA, SAORGE, SANT VALIER DE TIÈLH** n'an prestat a gratis de salas per lu cors de lenga ò ataliers, li aremerciam finda. Li comunas de **NIÇA, LA TERNITAT, GRASSA, SANT-ANDRIEU-DE-LA-ROCA** an mes de salas a disposition contra pagament. Avèm una subvencion tanben dau **CONSÈU DESPARTAMENTAU DAU 06**, qu'aremerciam finda, que nos permete tra autre d'organizar lu Rescòntres Inter Musicaus de Bòn-Viatge e de menar la nòstra òbra editoriala. Tot aquò vos serà dich dau nòstre clavaire.

Per autre devem dire que l'IEO-06 es presenta dins d'autri institucions :

siam au **CONSÈU ACADEMIC DE LI LENGAS REGIONALI** au Rectorat de Niça, avèm participat an aqueu Consèu Academic lo 3 de decembre. L'IEO-06 siguèt rapresentat per lo sieu president Joan-Pèire Spies.

siam presents au costat de **SOLIDARSPORT**, gràcias a **CARLÒTA RUBINI** que faguèt d'animacions pròche de centenaus d'enfants sus **l'ÍSOLA SANTA**

MARGARIDA. L'Inspector d'Academia remarquèt li animacions e ne'n parlèt au Consèu Academic de li Lengas Regionali.

avèm despí la debuta la nòstra plaça au **FESTENAU DAU LIBRE DE DE MOANS SARTÒU** e sus lo pontin *Café Belles Lettres* dont fèm li nòstri intervistas en lenga.

siam dins doi commissions dau **PARGUE NAUTURAU REGIONAU DEI PREAUPS D'AZUR**, (PNR). Lu nòstres rapresentants son Andrieu Sàissi e Joan-Pèire Baquié.

eravam membre dau projèct **LEADER DE LA COMUNAUTAT DE COMUNAS DAU PAÍS DEI PALHONS**, Joan-Pèire Spies n'es lo representant. Mas aquesta estructura ven de desaparèisser dijòus passat en seguida d'una votacion da consèu comunautari. Continhuam de trabalhar en pertenari emb'aquesta comunautat.

Siam partenaris de l'associacion « **COURIR À PEILLON** », que fèm parèisser d'articles bilingue sus dau sieu site.

siam sòcis dau **FORUM D'ÒC**, que si recampa doi còps l'an en seduda pleniera. Siam representats da Andrieu Sàissi.

Fa partida dei objectius d'espandir la lenga e, per aquò faire, avèm besonh de relais e de la volontat de collectivitats. De lònca avèm obrejat per faire ientrar l'IEO-06 e la lenga dins li institucions, sensa faire de politica politiciana.

La vida de la seccion

4 L'ensenhament

Per nautres es un sector clau perqué sabèm que la sobrevivença de la lenga passa per l'ensenhament.

Malurosament la situation non si melhora, la chifra dei oras, dei professors, dei escolans, dei establiments, son a la bassa.

Lo Conselh Academic dei Lengas Regionali

Lo Conselh Academic dei Lengas Regionali s'es acampat lo 3 de decembre. Joan-Pèire Spies rapresentèt l'IEO-06. Siguèt fach lo ponch sus la situacion :

Maugrat de li avançadas dei darnieri annadas, en seguida dau part Lenga Regionala dau Plan Academic de Desfopament 2010-2014, la situacion continua de si degalhar.

En lo primari, li tres classas bilingüi de l'Escòla dei Portegaliers fonccionan per la quinta annada. La dubertura d'una classa en setembre venent va permetre d'aculhir d'escolans novèus dins lo cursus, que anerà de la pichina seccion au CM2 au jorn d'ancuei (3 classas de 25 escolans). Si pausa la question de la seguida de l'ensenhament bilingue au colègi.

Demandam :

la dubertura d'autri classas bilingüi
de formacion a toi lu nivèus
de tornar durbir lo pòste de conselher pedagogic.
La sauvagarda dau departament lenga d'òc de a l'universitat de Niça, qu'es en grand perilh,
que lo vòlon barrar.
de formacion per lo DCL dins l'institucion (lo GRETA lo porria faire que lo DCL pòu faire aver
d'ajudas dau consèu regional).
que l'ensenhament sigue possible per toi lu escolans
lo remplaçament de toi lu professors que s'en parton au retir.
que lo rectorat augue la volontat de promòure mai l'ensenhament de lenga, per revenir, au
manco dins un premier temps, au nivèu de 2014.
La firma d'una covencion embé lo Consèu Regional, qu'es lest per lo faire.

L'IEO-06 partenàri de l'ensenhament public

Fèm d'intervencions pròche dei escolans dins l'encastre de Solidarsport sostengut da l'Acadèmia.

junh : Rescòntres Solidarsport sus l'**ÍSOLA SANT ONORAT** (Carlòta Rubini)

a la rentrada dau 2018 : intervencions de **CARLÒTA RUBINI** a l'escòla de **TORETA-LEVENS**.

a la rentrada dau 2018 : intervencions de **MARC WALTZER** a l'escòla de **GAIRAUT**.

La vida de la seccion

5 Li accions en partenariat embé li institucions ò d'autri associacions

Per memòria :

Partenariat mé Solidarsport

L'IEO-06 participèt a una jornada d'animacion « Solidarsport » sus lo respèct per lu pichoi. (Carlòta Rubini e Patricia Funghini).

Partenariat embé lo PNR Prealpes d'Azur

Siam marcats en li comissions comunicacion e culturas que nos semblan èstre li comissions dont si pòu faire ientrar de lenga en de documents sieus. Decideriam de rescontrar directament lu cònsols de li comunas dau Pargue e de li regalar diccionari e gramàtica per lu sensibilizar a la promocion de la lenga e de la cultura. Andrieu Saissi si passeja dins tot lo territòri dau pargue per rescontrar lu consòls, li donar d'informacions sus la lenga e li regalar diccionaris e gramàtica.

*Partenariat embé la **MJC AGORA NICE- EST***

Organizacion dei *Rescòntes Intermêles de Bòn-Viatge* que si debanèron lu 7 e 8 de novembre.

Partenariat embé la pressa

L'atalier de coïna dins Vaquí lo 28 de genoièr.

Lo 16 d'abriú : Article Niça-Matin a prepaus de **JOAN-PIÈ AIPERTO** e l'escòla de campaniers

*Partenariat dins l'encastre d'un **RECAMPAMENT D'ASSOCIACIONS CULTURALI***

L'IEO-06 siguèt a l'origina de la formacion d'aqueu collectiu per organizar la Dictada occitana a Niça (Si debana en 45 vilas de l'espaci occitan e de Catalonha, cad'an). Aqueu collectiu d'associacions a organizat per lo premier còp una dictada occitana comuna per toi lo 31 genoièr en lo 2015,

En lo 2018, siguèt un tèxte de **SILVIANA MAZZA-BORRIGLION**, per lo plaser de 170 participants.

Aquest eveniment fa partida dau païsatge culturau niçard.

Lo fach de recampar 8 associacions alentorn d'aquela fèsta de la lenga, lo fach de recampar toti li generacions, d'ancians que trevan lu cors de lenga coma de joves colegians e liceans, lo fach d'aver lo sosten dau **PROVISOR DAU LICÈU MASSENA, SÉNHÉR SERGI FERRARI**, dau **RECTOR**, de **L'INSPECTOR D'ACADÉMIA**, dau **PRESIDENT DE LA METROPOLE, CÒNSOL DE NIÇA**, dau **PRESIDENT DAU CONSÈU DESPARTEMENTAU**, e la presença dei representants de la comuna (**SÉNHÉR JOAN-LUC GAGLILOLO**, Conselher municipal delegat au Patrimòni istoric,

a la Literatura, a la Lucha contre l'illettrisme, au Teatre, a la Lenga niçarda e a l'Arqueologia) e dau rectorat (**SÉNHER STEVE BETTI**, Conselher dau Rector per la lenga regionala, e lo fach d'aver una visibilitat dins la pressa son una avançada pròpi importanta, e meton en vista la vitalitat de l'accion per la lenga.

Avèm de mai en mai de sostens. Aquesta manifestacion faguèt evoluir li mentalitats e mòstra la dralha per bastir d'accions que recampan en luec de restar embarrat dins un "nissardisme estrech".

La dictada dau 2019 que ven de si debanar recampèt **MAI DE 200 PERSONAS**, vengudi per escriure un tèxte estrach de **VERDUNISSA**, da **PASCAL COLLETA**, embé la presença de la pressa (**NICE-MATIN**) e la television (**AZUR TV**).

Partenariat embé lu Rescòntres occitans en Provença

Si debanèron dau 28 de julhet au 4 d'aost : animacion de l'atalier lenga (Joan-Pèire Baquié), de l'atalier botís (Regina Baquié), de l'atalier teatre (Joan-Pèire Spies), de l'Escoleta dei Rescòntres (Veronica Champollion).

L'i siguèron 12 sòcis de l'IEO-06.

*Partenariat embé L'**OSTAU DAU PATRIMÒNI DE COARASA***

per la sieu comunicacion en lenga

Partenariat embé Courir à Peillon

Serada festiva a Pelhon embé l'associacion "Córre a Pelhon" lo 4 de març

Activitats e servicis per lu sòcis

6 Lu ataliers de la seccion :

Cors de lenga

Lu **CORS DE LENGA** setmaniers : son 6

Lu cors recampan sempre totplen de monde, son 120 personas de marcadi.

Per memòria citerai lo cors de Sant Jaume, a Grassa (20 escolans marcats) aqueu de la Còla (20 escolans marcats), aqueu de Niça (Bòn Viatge) (12 escolans marcats), aqueu de Drap (15 escolans), a Contes (25 escolans), a Saorg (10 escolans). Una capelada ai professors : **JÒUSETA MORANÇAY, GUIU RAMI, FREDERIC MARTRON, ANDRIEU SÀISSI, PATRICIA FUNGHINI** en país grassenc, **JOAN-PÈIRE BAQUIÉ, VIVIANA NERVO, FRANÇON DALBERA** a Niça, **Marc Waltzer, Rogier Gilli**, en valada de Palhon, **JAN-PIÈ AIPERTO** a Saorg.

Avèm de demandas per faire de cors en d'autres luecs, la demanda es importanta, auriam da besonh d'autres ensenhaires, convidi lo monde de l'IEO-06 a si formar. Siam lèsts a ajudar lu volontaris.

ATALIER COMEDIA

Foncciona despí doi ans a Niça (Sant Ròc), menat da **KIKI BAILLY** (10 personas). Un biais autre de trabalhar la lenga, sota de formas diferenti : cant, teatre, dança : Augueriam l'escasença de veire un bèl spectacle per la fin de l'an escolar.

Ateliers de dansas populari

Lu **ATALIERS DE DANÇAS POPULARI D'ÒC** recampan a Grassa cada 15 jorns toi lu afogats dei baletis (33 personas) sota la direccion de **MARIA CRESTINA BRAVET** e **JOAN-PÈIRE CHIAPELLO**. Lu remerci per lu renduts-còmptes que mandan e que permeton una ligason emb'au cors.

L'atelier de la TERNITAT (16 personas) es bailejat da **VALERIA ROSSO**, acompanhada da **FABIAN ROSSI** quora lo sieu trabalh li permete. Aremerci Valeria que fa passar lu messatges per remembrar li datas dei ataliers, e que participèt embé una chorma au **FESTENAU DE DANSAS DE LA TERNITAT** lo 26 de novembre.

Lo **PICHIN BALÈTI DAU DILUNS**, que si recampa cada premier diluns dau mes a la MJC Agora niça -est gràcias a **ROTLAND IVALDI**, que n'es lo coordinator e que convida cada mes de musicians, qu'aremerciam fòrça, per faire balar lo monde (en particular, son venguts **SYLVIE, EVELINA , NOËL, MABRUND'AMOUR**). L'aremerci per lo sieu investment. Un animator devia pilhar encarga l'atelier, mas non s'es fach fin finala, e caurà trovar un reponsable per remplaçar Rotland en setembre.

atelier de teatre

En lo 2018, l'**ATALIER DE TEATRE** continuèt de recampar un vintenau de personas qui si perfeccionan dins la lenga d'un biais autre. Cau remerciar **CHOASA FERRANTI** qu'es responsable d'aquel atelier, e **GILBE COMBE** que metèt en plaça un projèct d'espectacle, «**ISTÒRIA DE JANA LA PICHONA MESTRESSA DE LAS MARMÒTAS**». Lo succès remirable dau temps de la creacion lo 17 de novembre dau 2017 en **BERGIER** menèt a tornar jugar la peça a **SANT VALIER DE TIÈLH** lo 10 de

junh, pi a **NIÇA**, au **TEATRE DE LA CIUTAT** lo 18 de novembre, davant d'una sala clafida.

Siam urós de la capitada d'aquest projèct d'importança e dau succès d'aquesta darriera representacion, que permetèt de mostrar la vitalitat de la creacion en lenga, e dins un luec que non es reservat a la lenga e a la cultura regionala. Lo representant dau Cònsol de Niça, Sénher Joan-Luc Gagliolo, qu'es finda rsponsable dau Teatre Niçard de Francis Gag, nen faguèt lo plaser e l'onor de l'i èstre present e de congratular la chorma per la qualitat de l'òbra facha.

Una representacion novela es prevista a Pelhon lo 31 de març, e un projèct novèu es a s'alestir, Gilbe nen parlerà dins gaire.

L'ESCÒLA DEI CAMPANIERS

Foncciona a Saorge despí setembre dau 2013, aculhe 5 escolans. Jan-Piè Aiperto n'es l'animator.

atalier coïna

L'ATALIER COÏNA a foncionat despí la rentrada de setembre dau 2014 sota la responsabilitat de **CRESTIAN DESRUMEAUX**, l'atalier s'es acampat 3 còps en lo 2018.

Faguèt la còca dei reis lo 3 de fevrier

Auguèt finda l'onor de la pressa televisada per la receita dei raiòlas au la dauba e ai bleas, grans classics saborós prepauats da Crestian e Regina Baquié e la chorma de l'IEO-06.

Lo reportatge es passat diménegue lo 27 de genoier sus **FRANCE 3 PROVENÇA AUPS CÒSTA D'AZUR** dins un numerò de **VAQUÍ** consacrat a « la coïna niçarda ».

L'ATALIER BIBLIOTÈCA

Es Carlòta Rubini que s'entrevia d'aquò cada dimarç, presta de libres ò de CD a toi lu sòcis que lo desiran. A fach la tiera de toi lu libres e CD a disposicion dei sòcis de l'IEO-06. Lu libres si pòdon mandar per pòsta ò per lo biais d'amics que venon ai diferents acamps de l'IEO-06.

Lu libres son dins un garatge pròche l'Anima'Nice.

TOTI LI ACTIVITATS SON A GRATIS. Cau aremerciar toi lu animators, benevolencs, dau sieu acuelh e de la sieu disponibilitat. Podèm au manco picar dei mans per elu !

Activitats e servicis per lu sòcis

7 Li jornadas « DESCUBERTA DAU PAÍS, CAMINEM EN ÒC »

Son preparadi da **JOAN-MARIA ROSSET** qu'es lo responsable d'aqueli jornadas descuberta, e da **ROGIER VIALE**. Lu vòli aremerciar tot'ai doi. Aqueli jornadas n'an permés de descurbir de gents que parlan occitan e lo país alentorn.

Aquesti caminadas son l'ocasion de tèisser de liames tra sòcis, embé li comunas e lu sieus elegits.

Ne'n fagueriam 3

Caminada a **SANT JOANET** lo 29 d'abriu

Caminada dins **SANHA** lo 10 de junh

Caminada a **LA BRIGA** lo 21 d'octobre

Activitats e servicis per lu sòcis

8 Lo camin de la lenga d'òc

Aquest an non durberiam un novèu camin... da veire dins l'annada, s'avèm de propòstas.

Activitats e servicis per lu sòcis

9 Li fèstas de l'IEO-06

Per memòria citerai

Còca dei reis a Niça, IMJC Agora Nice est, e a Grassa, sala Sant Jaume en genoièr

Serada de l'amistat a la Sosta de Pelhon ensems mé l'associacion « Courir à Peillon » lo 17 de març

Fèsta de fin d'annada escolaresca a Còntes lo 20 de junh

Fèsta de fin d'annada a Grassa au mes de junh.

Lu sòcis de Grassa e de La Còla si son acampats per lu 13 desserts a Grassa (mai ò mens 40 personas l'i participèron) au mes de decembre.

Parier en decembre lu sòcis dei cors an festejat la fin d'annada a Còntes, a Drap e a Niça.

La promocion de la lenga

10 La creacion

La cronica «**RIBON-RIBANHA**» (fonciona despí lo 2 de novembre dau 2008 ribonribanha@yahoo.fr) persegue lo sieu camin despí mai de detz ans. Es Marc Waltzer qu'a la responsabilitat d'aquesta crònica . Avèm publicat **MAI DE 430 TÈXTOS DE CREACION** prepausats da mai de 60 escrivans amators diferents. (**mai de 5 000 visitas** cad'an).

Aquesta crònica, qu'es vòstra, e que si devon renovar lu autors per mai de tèxtes da publicar per lo 2019, a besonh de vos... Non trantalhetz a ne mandar lu vòstres tèxtes !

Despí 10 ans finda **JOAN-IVES ROYER** nos manda la sieu crònica setmaniera de **l'AGACHAIRE** en aupenc. Es una cronica que passa cada diménegue sus lo jornal « La Provence » e tanben sus lo nòstre site IEO-06 lo meme jorn. (**mai de 4 200 visitas** cad'an)

La promocion de la lenga :

11 l'IEO-06 sus la telaranha

LO SITE

Despí lo mes de setembre dau 2004, l'IEO-06 a lo sieu site <http://ieo06.free.fr/>.

Siam passats de 492 articles escrichs en 2005 a **3 711 articles** au jorn d'ancuei. 174 articles son pareissuts en lo 2018, es a dire quasi un cada doi jorns !

Siam liejuts dins lo monde entier : Lo site es estat visitat en l'an 2018 da 24 384 personas (529 327 visitas despí la sieu creacion), en lo 2018 an liejut 121 404 pàginas.

Aquí encara es un tapa novela aquest'an !

L'avii anonça l'an passat, remebratz-vos :

LO MILLION ! 1 026 377 pàginas liejudi despí la sieu creacion.

Devi aremerciar Joan-Pèire Baquié e Marc Waltzer per la sieu ajuda. Marc que aüra s'entrevia per la quarta annada de la cronica Ribon-Ribanha lo dimècres e aquela de l'agachaire lo diménegue.

Despí lo 2018 son ajudats da **CRESTIAN DESRUMEAUX** que pilha la sieu part per metre lu articles sus lo site, en particular auqlu dau blagaire. Lo reengraci finda fòrça.

Aquelu que recevon pas'ncara lu articles de l'IEO-06 sus la telaranha si porràn marcar per fin que li mandessiam tota l'actualitat occitana, practicament un article cada jorn.

FACEBOOK

En lo 2013 aviavam dubèrt una pàgina FaceBook.

Li doi pàginas noveli que son estadi duberti en lo 2016, sus Facabook : IEO-06 e **LO BLAGAIRE**. Aquesti tres pàginas, au jorn d'ancuei, recampan **1700 « amics »** segon l'apelacion consagrada (1400 en lo 2018, 327 en lo 2013).

Fa mestier de trovar de monde que posquesson pilhar la seguida per gerir lo site, metre d'articles en rega... Aquest trabalh per lo site IEO-06 demanda totplen de temps, e seria una maniera melhora de faire de si despartir lo trabalh. Parier per Facebook que Joan-Pèire Baquié administra despí d'ans e d'ans.

La promocion de la lenga **12 L'édicion**

Avèm continuat d'anar de l'avant dins lo nòstre trabalh d'edicion.

En l'annada 2017 èra : *La Lenga per present*, recuelh de tèxtes de Joan-Pèire Baquié.

En lo 2018 travlheriam en partenariat embé l'**INSTITUT D'ESTUDIS NIÇARDS** per fin d'editar ensems lo libre de **ROBERT ROURET, TROUBADOURESQUES**.

Aquèu projèct es a mand de s'acabar, que lo libre salhirà dins gaire. Es prepauat a la venda ja, lo podètz reservar pròche de Carlòta.

Vòli aremerciar fòrça **ANNA-MARIA SGARAVIZZI** dau sieu investment dins lo projèct e de la sieu energia per faire lo ligam tra li doi associacions.

Avèm un autres projèct que s'encaminèt en lo 2018, es l'edicion dau libre de **JOAN-GLAUDI PUECH, CORTETAS DE MALANCA**. Aqueu recuelh de tèxtes, que son pareissuts dins lo Ribon-Ribanha, es estat **premiat** au **CONCORS DE LITERATURA DAU VAU D'ARAN** en lo 2018. La sortida d'aqueu libre es prevista per l'auton.

La promocion de la lenga : **13 La difusion : la libreria de l'IEO-06**

Coma cada annada es lo festenau dau libre de Moans Sartòus premier que dona l'ocasion d'escambiar emb'au monde que visitan lo nòstre estand, de si faire conóisser e de vendre la nòstra produccion. Avèm multiplicat li jornadas de presentacion dei nòstres libres.

Merceji tanben toi aquelu, numerós e voluntós, qu'an tengut l'estand au festenau de Moans e en d'autri luecs, Carlòta Rubini que gerisse l'estoc, Patricia Funghini que mete lu libres en tableu per una bòna gestion.

Lu estands de l'IEO-06 e de la sieu libreria :

en abriu a la Jornada niçarda a la **Maion Francine Gag** (Carlòta Rubini, Françon Dalbera)

au festenau dau libre de **PEYROULES** lo 8 de setembre (Carlòta Rubini)

lo 9 de setembre : **Fòrom dei Associacions de Pelhon** (Joan-Pèire Spies, Marc Waltzer)

lo 10 de setembre : **Fòrom dei Associacions de la fièra de Còntes** (Marc Waltzer)

lu 5, 6, 7 d'octobre : **Festenau dau libre de Moans-Sartòus** (Carlòta Rubini)

lo 21 de decembre : **Mercat literari de Calènas a Niça** (Joan-Pèire Spies)

La promocion de la lenga

13 Lo partenariat embé li publicacions

Sus dau site de la comuna de Coarasa e dins lo jornal de la comuna **SO PORTAL** : articles en lenga (Joan-Pèire Baquié)

Dins lo jornal comunal de Pelhon, **LE PETIT PEILLONNAIS** : un tèxte en lenga dins cada numerò (Joan-Pèire Spies)

Dins la **REVISTA DAU SINDICAT INTERCOMUNAU DEI PALHONS** : tèxtes en lenga (Joan-Pèire Spies)

Dins lo jornau mesadier **VIE VILLAGES** : una pàgina de niçard (leiçon per emparar lo niçard) cada mes, da Joan-Père Spies

lo jornal es a jaba e es regalat a 12 000 personas de 28 comunas dau canton de Torreta-Levens. La pàgina en un pauc mai d'un an e mieg de temps a trovat lo sieu public e permete a l'IEO-06 de socializar la lenga pròche una partida importanta dei estatjants dau 06.

La promocion de la lenga

13 La comunicacion

Per la novena annada, l'IEO-06 a publicat un **DESPLEGANT (500 EXEMPLARIS)** per faire conóisser li sieu activitats ai particulars e associacions. Es una ajuda preciosa l'avèm aremarcat sus l'imatge de marca de la nòstra associacion pròche lo public e lu elegits.

Siam estats presents dins la pressa. D'articles son pareissuts dins **NICE-MATIN, AQUÒ D'AQUÍ, OCCITANS, OU PAÏS MENTOUNASC**. D'articles an pareissut sus la **LETTRE DU PAILLON**, *le Petit Peillonais*, lo site de la vila de Còntes, sus lo site de L'Ostau dau Patrimòni.

Per acabar, denant de vi demandar d'aprovar aquest rapòrt, vòli remembrar li orientacions pilhadi a l'AG passada per lo 2018.

Coma l'avètz capit, l'annada 2018 siguet rica de trabalh e d'eveniments. Avèm de mai en mai d'activitats per respòndre ai demandas dei sòcis, e de mai en mai d'intervencions que tocan lo public, siam de mai en mai reconoissuts.

Avèm capitat, mi sembla,

de gardar lo nòstre engajament dins lu domanis dont sabèm que lo monde son implicats per la conoissença e l'espandiment de la lenga e de la cultura ;

de persegre lo nòstre trabalh d'edicion, e de difusion de la lenga ;

de persegre lo nòstre trabalh de creacion e de presentacion de lenga viva, (teatre, cant...) ;

de contunhar a desfolopar lu nòstres partenaris ;

de sostenir cen que si fa dins l'ensenhament public ;

de faire viure dins li nòstri activitats li valors de tolerança, de respèct e de fraternitat.

d'èstre implicats dins doi eveniments en lo 2018 :

Lo Congrès dau Forum d'òc

Lo desen anniversari de Ribon-Ribanha

Per autre, mi sembla que siam pas estats capables de faire fonctionner coma cau lo burèu. Segurament la mieu manca de disponibilitat n'es responsable.

Nen fa mestier un segretariat que sigue a la mesura de li accions que menam.

Caurà finda formar de monde per anar de l'avant, e sobretot de recampar de monde alentorn d'un projèct de comunicacion : site, rets sociaus ; dins aquò avèm gaire capitat

Pura l'associacion a perseguit lo sieu camin e es estada presenta quora calia e va de l'avant.

Aquesta annada, siguèt **una annada de capitadas e de reconoisença de la qualitat de li nòstri accions, de la diversitat de li creacions dins lo domani de la lenga, eschris numerics, edicion, teatre.** Embé lo CA, avèm gardat la nòstra amira de dubertura, dins lo sens de la preservacion de la diversitat culturala e lingüistica sensa exclusion. Esperi que l'ensem dei sòcis gardan fisança dins la sieu associacion per portar au mai enaut la creacion, la lenga, lo desfolopament dau biais de viure portat per la cultura e la lenga occitani.

Denant de presentar l'orientacion e lu projècts per lo 2019, vi demandi d'aprovar aquest rapòrt dei activitats dau 2019.

Gramací.

En Bergier, lo 9 de fevrier dau 2019

Joan-Pèire SPIES President sortent de l'IEO-06